



國別集

公移目錄

卷之一

行三司會議用兵事宜案

撫諭番蠻告示

撫安良夷案

躡探番寨案

行松茂道隄備案

撫恤軍士案

調兵案

行統兵官曹克新督勵軍士案

行軍事宜案

切責威茂兵備道案

督責各道案

又督責各道案



行何總兵督剿案 行軍賞罰號令案

行何總兵并守巡兵備等道督剿案

督厲將士案 督責擒拏魁首案

行何總兵擒拏黑殺案

行何總兵招撫漢人案

行何總兵刻期班師案

燕勞從征文武官負案

卷之一

咨利弊以便興革案

通催興革利弊案 祛積弊以甦民困案

議處錢糧徭役條約案

興革利弊各項事宜案

卷之三

定刊賦役總會文冊案

查處驛傳事宜案

禁革詐假關牌需索告示

查處里甲公費并走遞夫馬案

查處合屬官負公費案

各道駐劄地方公費案

查理邊務案

祈雨案

之園別集 公移目錄
祈晴案

又祈晴案

賑恤事宜案

裁定合屬民快案

卷之四

行各兵備道稽查邊鎮錢糧案

議處松茂安綿邊糧案

查處類解貴州倉糧案

議處成都豐寧二倉錢糧案

議處京料解戶案

存留餘米折徵戶禮工三部料價案

卷之五

咨訪利弊告示

禁革各王府并儀賓不許聽信撥置規詞告

擾告示

定刊賦役總會文冊案

申飭官箴案

清查虛糧以澄宿弊案

弭盜賊以安地方案

嚴責任以弭盜賊案

查處南新二縣里甲案

申嚴巡河官兵以弭盜賊案

禁革機兵不許跟衙及撥跟鄉宦案

禁革私宰耕牛案

咨利弊以便興革案

禁約崇仁縣奸弊案

嚴捕盜賊案

禁約糜費案

查議千金陂工案

定賦役以一政令案

革弊除害甦民困苦案

徵收錢糧案

芝園別集

公移卷之

行三司會議用兵事宜案

一為征剿逆番事近該白草西番背朝廷覆冒之

恩違本院撫鎮之令侵掠地方殺傷官軍窮兇以逞

法所不原合圖萬全之策以收蕩定之功擬合就行

會議為此案仰該司會同都按二司各掌印佐貳官

即便會集公所從長計議要見調發何處兵卒各若

千各於何處駐劄該何官統領支運何項錢糧各若

千各於何處收貯該何官監支叅遊都司等官如何

分布兵備守巡等道如何監督如何克復信地如何

控扼要害如何離其黨與如何搗其巢穴左右前後如何夾攻彼此遠近如何應援有功者如何賞賚有罪者如何罰治務集衆思以收群策謀慮必出於萬全戡定期在於一舉逐一開立前件并其餘未盡事宜備細計議定限三日以裡呈報毋得延緩期日致悞軍機及虛應故事無益實用仍通行在外各道并見今領兵防守叅遊都司指揮以下等官各將前項事宜一體逐一條陳徑自差人火速齎報施行俱毋違錯不便

撫諭番蠻告示

一示諭各番知悉 朝廷經理天下鎮定邊疆使汝等安居樂業且時加賞賜恩莫大焉今汝等乃劫掠地方殺傷官軍肆行兇惡從來未有罪已貫盈法所不宥已經動調兵衆刻期征剿但念汝等皆為天地生物皆為 朝廷赤子况我下車之初恩信未孚若不先行撫諭遽行誅戮有所不忍今特諭汝等若悔毋聽奸人誘引自蹈死地汝見被官軍殺死者登時肝腦塗地雖有搶獲不得受用即使一時僥倖傷害官軍堂堂 天朝兵衆無數必大行調發四面攻圍持以歲月不盡殲醜類不已那時即欲投降亦無

及矣况白草地方原係石泉縣所管里分後因汝等
寄住生息姑爾容留不加誅逐則莫酒平番關堡皆
我中國地方汝等豈得以取復原地為詞汝等有知
事者從長計議即將殺害官軍兇首擒斬就近統
兵官司投獻并退保本寨將我奠酒平番關堡協力
修築照舊認守我當轉奏 朝廷饒爾罪過仍照舊
犒賞決不虛示如再觀望為害必大舉征討蕩掃巢
穴使噍類不遺汝等速宜首報毋失事機

撫安良夷案

一為撫安良夷事照得白草番結節次出沒為害
惡貫盈已經案行都布按三司會議調集兵糧刻期
進剿但恐隣境良夷一聞動調大兵或被白草番蠻
誘哄未免驚疑擬合撫安為此案仰各道即行各該
關堡提督掌堡等官或用信旗或用木刻令熟番牌
頭通把人等傳諭各寨良夷各要照舊安心住種自
保身寨毋聽白草奸夷誘哄自生驚疑牽引為非仍
將傳諭撫安過緣由回報查考俱毋違錯未便

躡探番寨案

一為征剿逆番事案照節據安綿兵備道呈報白草
番蠻出沒為寇已經案行三司會議動調大兵刻期

進剿但番蠻多寡出入道路未曾躡探的實有礙進
兵擬合就行為此案仰安綿兵備道即便密切會同
叅將杜欽遊擊曹克新等選差鄭彥昇等着落熟識
地里鄉導通事人等潛入番境躡探白草青片番族
各若干要見某寨番蠻數多某寨番蠻數少某處為
要路可以斷援某處為生地可以進兵某處可以屯
聚某處可以夾攻某寨我可據險可以圍困某寨賊
可邀截相應隄備某處可以設伏某處可用火攻務
要更番迭遣研審的實仍責令圖畫形勢明如指掌
以便相機進剿毋得偏聽一人致有反覆及遙為德
度報告不真或漏泄消息致悞軍機該道查訪既實
親筆書寫仍密切固封差人呈報本院酌量施行
行松茂二道隄備案

一為地方事照得近因白草番蠻為寇已行都布按三
司會議調集兵糧刻期進剿外查得松茂二邊番寨
雖經節年撫賞奉聽約束但犬羊之性本為無常而
唇齒之勢又易牽引誠恐各道玩于隣之震怒衣衽
之防以致倉卒變生噬臍無及况禦敵者不於其所
攻而於其所不攻圖患者不在於有事而在於無事
使各邊備禦俱飭威武用張則聲勢聯絡自可以作

我軍之氣勢而間諜周詳又足以遏番寇之交通此策之最先者也擬合通行爲此案仰該道即便嚴行各該副總叅遊守備等官各要加謹隄備一面速查提督掌堡等官有關冗不振者呈來更換各關堡守禦軍士內有老弱者即令勾取壯丁換補或額數原少者量與增添其有精銳村勇堪以應敵者量與團練逐一備細查明斟酌停當務在保障地方共保無虞隣封有警相機策應俱毋違錯未便

撫恤軍士案

一爲地方事照得石泉壩底徐坪等關堡調到各處漢土官軍民兵保羅鄉勇等兵在彼防禦日久因念各人遠離室家拋棄生業殊非人情所堪若不曲加撫恤朝夕得所則各懷缺望士氣不振其何以用之於敵愾哉况各人草居露宿飲食多不如意即今天氣向暄恐有疾病生發合用醫藥亦須處備擬合就行查處爲此除行成都府動支官銀收買藥餌責成醫生前來隨軍醫治外案仰各將官即便嚴令本部下領軍管隊官旗各要加意撫恤軍士甘苦饑飽必與衆同但有疾病責令醫生用心療治中間或有病故者監督各道動支官錢處備棺殮遞送還鄉埋葬

毋令失所若有虐害軍士者就彼從重責治仍指實
叅呈本院拏問定以軍法從事決不輕恕本官仍集
所部漢土官兵備將本院閔恤之意諭令知悉如各
兵有雇清冒名代替私自逃回者依律重治代替之
人就彼充軍本管頭目一體治罪先具遵行過緣由
同不違依准呈來

調兵案

一為征剿逆番事據布政司呈詳會同都按二司議
調漢土官兵數目緣由到院案查先據安綿兵備道
呈報白草番蠻為寇已行該司會詳之後今據前因

本院查訪慣戰領兵將官報稱各處兵卒衆寡強弱
間有不同况或用之於防禦或用之於大征道里遠
近與調發先後亦須斟酌量為增減并分別遲速庶
便遵依及檢會大明律內一款一領兵官已承調
遣不依期進兵策應因而失快軍機者斬又一款若
軍臨敵境托故違期一日不至者杖一百三日不至
者斬又一款凡軍人不親出征雇倩人冒名代替者
替身材八十收籍充軍正身材一百依舊充軍等因
除欽遵外擬合通行遵照聽調策應征剿為此案仰
布政司即便查照後開註定名數除已調到者各領

兵官嚴加操演隄備已調未到者本院一面徑行各該衙門催調轉發應該整備聽調者行令選集聽調該司仍行都按二司并安綿威茂守巡兵備等道及將官與應催調衙門各一體查照催發操備施行敢有遲悞軍機者律令具在必不輕貸俱遵本院原奉勅諭凡軍民一應機宜悉聽便宜從事并番賊搶掠居民即督令叅將遊擊等官發兵剿捕遏截事理施行仍備呈巡按察院知會俱毋違錯未便

行統兵官曹克新督勵軍士案

一為征剿逆番事案照先為前事已經推委原任遊擊署都指揮僉事曹克新統兵防禦去後今訪得軍中賞罰不嚴號令欠肅以致兵威不振尅敵少功擬令就行督勵為此牌仰本官夙夜矢心忠勤自誓知國恩之當報軍令之匪輕務使約束嚴明毋違紀律訓練精熟毋致惰偷常懷敵愾之心用張虎豹之勢但遇番賊出沒即便相機截殺中間有事體重大應關白本院者密切具稟應會同兵備守巡者計議施行如變起倉卒或事得專制者悉聽便宜從事所統指揮而下平居不遵號令者徑行細打或綁縛送院從重處治其臨陣退縮者即依軍法斬首以徇本官亦

宜仰承副托身先士卒以靖逆醜如因循怠惰失悞軍機律令具在決不輕貸仍備云大書出給告示諭衆施行俱毋違錯未便

行軍事宜案

一爲征剿逆番事近因番寇出沒荼毒地方節將防禦征剿事宜備行安綿兵備道遵照去後日久通無回報未審有無施行今屯駐既久不免老師費財而兵氣不揚何以克敵制勝所有一應事宜合再通行申明爲此案仰安綿威茂等道查照後開條件務要着實舉行其餘未盡事情亦聽便宜從事如關係重大者仍呈詳定奪必須彼此協力早夜圖謀務於擒之績以贖東隅之愆毋得仍前怠緩違悞軍機本院以奉行之遲速爲功罪之斷案雖欲隱蔽而不可得也仍行各領兵將官并守備同知等官一體遵照施行俱毋違錯不便

計開

一議征剿夫兵難遙度事忌中制然未有不入虎穴而能得虎子者也兵備守巡各道就與各將官從長計議畫定方略如事勢未便則持重以待時幾會可乘則速發以趨利其未動也長爲

吾之不可勝以待敵之可勝其欲動也則諸道
並進以分其勢聲東擊西以擣其虛此其上策
也

一嚴賞罰古云兵無賞士不往又云威克厥愛允
濟此言賞罰之不可已也各道與各領兵官俱
遵奉先行牌案將見在漢上官兵通行挑選老
弱者即便退換強壯者不時訓練其下營操演
武藝精熟者或探聽番情傳報迅速者或臨敵
應變奮勇當先者將軍前銀兩隨宜給賞其有
平居操練或有警調遣不即用命者皆重罰下
輕則就彼網打重則綁縛解院其有臨陣退縮
者即依軍法斬首以徇使軍士赴鬪甚於趨利
其畏我也甚於畏敵有不戰戰必勝矣

一復信地奠酒平番關堡原係石泉縣地方先年
奏請設立此信地也各將官傳諭番夷自知
悔禍助力修築照舊屯兵防守則或撫或剿得
以請朝廷之命而我師亦可緩矣如其不然
聚兵積糧遲以歲月一舉不克至於再再舉不
克至於三至於四五不盡掃巢穴蕩平醜類不
已各道與各領兵官宜相機設策及早修復以

便進止

一謹關堡古人云毋恃其不來恃吾有以備之各該關堡固皆喉舌之地要害之區也先因備禦空踈釀成大患即今尚可不為之所乎仰行委守備耿垚同知高登分投前去查理各堡如軍兵老弱者即與更換守禦單寡者撥兵貼守未有官負者即與定委原有官而闕革不堪或提督官因循不振者即與選替務使保障完固聲勢聯絡無事則共成屏蔽有警則互為掎角仍要夙夜戒嚴緩急無患此今日之急務也

一嚴策應見在官軍共禦門庭之寇實有同舟共濟之義一營失利則各營同受其挫一營得捷則各營皆振其威况觀望失機律令具在有不假借者乎今後各該將官遇有警急即便移報各營星火發兵策應如報到而不發兵者罪坐不發之人有警而不報者罪坐不報之人本營士卒亦要首尾相應左右相援如一兵失利同伍同受其罪一伍失利本營同受其罪一營失利隣營同受其罪一堡失利隣堡同受其罪誓戒既申斷不輕貸

一精間諜兵法云知彼知己故敵壘之虛實道路之險夷非刺探不能詳而其間裝塘設伏偷營劫寨又有出於意料之外者各道與各將官俱遣親信間諜往來探聽彼此叅互務得真實復審寨碉房山川道路歷歷如指掌因而分哨布陣登高據險庶無後艱

一申號令律法領兵官不依期進兵策應若承差告報軍期而違限因而失候軍機者並斬若軍臨敵境托故違期三日不至者斬守邊將帥失陷城寨者斬若與賊臨境其望高巡哨之人失

於飛報以致陷城損軍者斬其官軍臨陣先退及圍困敵城而逃者斬軍人私自擄掠傷人者斬又查各處軍令軍中無故喧嘩警報者斬殺賊爭取首級者斬賊敗棄遺財物因而拾取者斬軍行離亂部伍者斬止宿擅出入營門者斬各將官俱遵照行事仍先期三令五申諭報知悉

一修道路各將官先將分定哨分進兵路道逐一探視如有坑塹阻塞草木茂盛及偏橋損壞或陝隘艱行者作急設法開通其有大溪小河難

以徑涉或用舟渡或用筏渡亦就隨宜料理
一嚴把截節據各官呈稱進兵路道與番賊出沒
處所不一其曰由平番大魚口通走馬嶺龍鬚
三溪等寨又一股順河木梯三道曰由壩底通
桃紅轉架龍藏等寨又一股順山透壩底坪曰
龍州過河老鷹坪何仁山通白羊毛坡等寨又
一股由乾坡口通蒿壩野猪坪等寨又一股由
黑水口通黃頭後水等寨或曰由徐坪堡沙坪
進或曰由大印進此進兵路也曰白馬路木瓜
坪曰鵝引溪黃頭嶺曰張村壩曰獨坪曰馬坪
口曰青泗口曰馬頭山曰土地嶺曰桃坪堡曰
小關子神溪溝土門堡曰自小河以至江油曰
自壩底以至石泉曰自曲山關以至漩坪曰自
大印以至徐坪此把截隄備路也各道會各將
官及高同知按據畫圖詳審鄉導要見何路可
以進兵何處可以安營何處須用把截何處須
用隄備何官領兵若干攻擊何處何官領兵若
干把截何處隄備何處其不係出沒奔突之所
無甚緊要者亦不必一槩張兵布陣以致勢分
力弱務要籌畫歸一計出萬全

一軍士臨戰只以衝鋒破陣為功不以斬取首級為功各將官惟以軍士之功為功不以本身首級為功如有爭功者重治以罪不論其功

切責威茂兵備首奏

一為征剿逆者事案照先該本院議調威茂兵備道所部軍兵一千名聽調若殺續據安綿兵備道呈報番情緊急已經差委指揮范鈺齋執令旗令牌前往該道守調前項軍兵發付參將杜欽統領策應仍具花名文冊繳報查考去後延久通未回報及查訪先行都指揮魯元忠領兵策應亦止是虛文回報並

無兵將前去為照白草番寇正與該道所管地方唇齒相連今共禦門庭之寇豈宜有彼此之分况各軍所給者朝廷之糧餉各官所奉者朝廷之職事

以地方不靖患在肘腋當如拯溺救焚今調發之令久下而整搦之報未聞則緩急何以相濟戡伐何以成功古稱四郊多壘卿大夫之辱况於身膺責任者哉如其無奉公體國之誠懷秦越相視之意則饋事示小矣本院方欲播告朝廷威令振揚六師以殄群醜今令不行於流官矣又何以行於土官乎令不行於百里之外矣又何以行於千里之外乎此誠安

危之機利害所關不容但已擬合行催爲此牌仰本
道務爲竭忠靖難之圖以成同舟共濟之義即將點
發過官軍兵勇先行開具花名年貌文冊同選發日
期具由一併差人齎院以憑查驗施行毋得仍前遲
違未便

督責各道案

一爲征剿逆番事案照先爲前事節將各項事宜備
行遵照及催調都指揮龔銳帶領松軍五百名前
策應去後即今軍兵四集將領分布間諜如已周
會似有可乘不宜曠日持久以致老師費財况

剿卷宗亦未見多用兵糧蓋善戰者能以寡而爲衆
避堅而攻瑕顧方略何如耳如訓練不精筭籌不密
則雖百萬之衆無能爲矣未得面計合再通行爲此
案仰各道并叅游等官即便上緊整飭兵衆計議方
略務爲必勝之謀以成掃蕩之績毋徒因循觀望虛
費兵糧如事體重大者仍須呈稟定奪俱毋違錯未
便

又督責各道案

一爲征剿逆番事案照先因白草西番聚衆出沒爲
患已經調集兵糧行委各該將領等官統領分布及

行兵備守巡各道監督仍照本院節行條約事理操
練兵馬會合相機刻期進剿去後今為日既久未審
關堡有無查理間諜有無精詳道路有無修通軍兵
有無選練號令有無申明分哨進兵與據險把截有
無會議歸一既不用心計籌又不遵令整飭徒聽奸
人反間輒用浮言搖惑以致老師費財迄無舉動將
來作何收拾及如何題 覆蓋不惟地方之禍未已
而旁觀者且將議我輩之後矣本院寢處不寧思欲
速靖軍民以追罪戾合再催督為此牌仰各道并叅
遊守備等官即將各所部官軍兵勇嚴加選練相機
其查理關堡精詳間諜修通道路申明號令并
分哨進兵據險把截事宜務要悉心經畫預定方略
以俟本院不久撫臨躬親視驗督兵進剿毋得仍前
緩怠致悞事機未便

行何總兵督剿案

一為征剿逆番事照得分守松潘副總兵中軍都督
府都督僉事何卿欽承 朝命征剿逆番即今進兵
在邇軍中號令皆須專制則統馭有歸得持生殺之
柄進退盡一可收渙散之心以戰則克以攻則取不
然雖孫吳韓白亦未有能成功者也檢會大明律內

開載領兵官不依期進兵策應若承差告報軍期而
違限因而失誤軍機者並斬若軍臨敵境托故違期一
日不至者杖一百三口不至者斬守邊將帥失陷城
寨者斬欽此欽遵今照本官身膺重責之責宜竭報
効之忠長慮却顧圖制勝於萬全掃穴犁庭期戡定
於一舉第恐各該叅遊將領等官不遵約束致誤軍
機合行申嚴總督為此案仰本官凡軍中一應機宜
悉聽便宜從事仍行叅遊守備提督掌堡等官一體
遵照俱聽本官調遣分布開闔進退必稟節制之令
攻伐擊刺悉遵指授之方既不許先時而妄舉亦不
許違約而後期如有故違者叅遊守備就便照依
機律例叅呈本院拏來監候劾奏其指揮以下徑自
拏問照依軍法從事仍行叅究本官不許徇情姑息
失律敗事自虧桑榆之績以損忠義之名俱毋違錯
未便

行軍賞罰號令案

一爲征剿逆番事案照先因白草等寨番蠻爲寇節
奉欽依撫剿屢行兵備守巡各道及各統兵將官
多方撫處各番仍復執拗不從近於八月二十一等
日糾集大衆攻打關堡神人共憤王法不容即今

進剿在邇所有賞罰號令合再通行申明為此案仰
都布按三司川西守巡安綿松茂等道總兵叅遊等
官即將發下告示各照後開事件仰各該監督文武
大小等官及軍兵人等一一遵奉施行

計開

一攻破番賊險阻營巢先登取勝者賞銀一百兩
仍奏請陞官敢入賊巢衝突殺獲有名首番
一名者賞銀五十兩從番一名賞銀三十兩
一衝鋒破陣者即為第一等功不分有無首級每
名賞銀三十兩官與奏請陞級內有不願陞

級願授賞者聽生擒番賊真正首惡一名者
首賞銀十兩為從五兩共十五兩從賊一名者
為首賞銀六兩為從四兩共十兩斬獲真正首
惡一顆者為首賞銀六兩為從四兩共十兩從
賊者為首賞銀三兩為從二兩共五兩若係一
人俱行全給官軍臨陣被殺者給銀十兩其被
殺傷殘與登山跌死落水渰死者各給銀五兩
跌傷已成痼疾者給銀三兩俱不分官軍民兵
若係職官另議加厚其番賊首惡合以兵將衙
門素知兇惡姓名與擒獲生番譯審無異者為

的衝鋒破敵合以勇敢登先挫敗賊勢為衆所
共見同心推服者為的其賊勢已敗巢穴已平
搜山獲功者生擒與斬首賞各減半

一遵照律法若與賊臨境望高巡哨之人失於飛
報以致陷城損軍者斬其官軍臨陣先退及圍
困敵城而逃者斬軍人私自擄掠傷人者斬

一行軍號令軍中無故喧嘩驚衆者斬殺賊爭取
首級者斬賊敗棄遺財物因而拾取者斬軍行
離亂部伍者斬止宿擅出入營門者斬故為揚
言虛張賊勢以沮抑軍心者斬通同番人透漏

消息者斬

行何總兵并守巡兵備等道督剿案

一為征剿逆番事節據分守松潘副總兵官何卿揭
帖并分巡兵備等道呈報白草番蠻投降緣由到院
經今十日之上未見出降消息察詳事情蓋前項番
蠻向來劫擄無忌罪惡貫盈今見大兵併臨勢力窮
蹙駕言納款陽緩我師即今遷延不決頭目未至明
是詭計偷生決非真心聽撫若就輕為信聽苟圖了
事沮帷幄之先謀銷士卒之銳氣本以有名興師而
乃以無功罷役則堂堂方鎮反墮於光頭狎狍之奸

矣切詳今次番情大異往日既殺我命官矣又陷我
關堡矣至於屠僇軍兵擄掠人畜不可勝筭若非擒
獻真正首惡陪償燒燬關堡送還被擄人畜罪必在
所不原况自去年十一月以來四境戒嚴合省騷動
調發兵糧動以萬計至使 朝廷遠厯西顧之憂撫
鎮緊羅失事之罪 命將專征督責嚴切今乃懷畏
縮之心為觀望之計飾招撫之虛名而忽安邊之遠
略曾不能窺番戎咫尺之地動番寨一草木之微而
遽欲釋橐解甲縱賊不討吾恐降旗未仆而旄頭已
動欲求旦夕之安不可得矣備查舊卷先年亦有所
謂招撫者率皆烈山焚寨破巢毀穴雖未能盡滅
類亦必擒斬渠魁使之號呼請命而後聽之未有不
征而撫者也萬一中其奸謀將米賊情反覆變亂
生則罔衆欺 君之罪誰則任之昔孫臏練宮女以
成軍光武騎耕牛以興漢今蜀中兵將挑選殆盡
又以衆加寡以順討逆以我之有制而克彼之無制
乃護為無用以沮士心此誠非本院之所知也為此
副總兵官何卿奉 命專征責任非小各該兵備守
巡等道均有地方重寄亦難坐觀成敗况 國家之
法例甚嚴本院之節制具在斷不敢上下雷同自貽

伊感擬合再行申督為此案仰本官即會各道詳議
如果各番實心投降務令速將真正首惡一一擒斬
獻出以抵官軍之命并送出原虜人畜陪還燒燬關
堡限本月初十日以裏星馳回報其各寨有執拗不
聽者仍須分別逆順進兵加誅如違限期就便督率
官軍直搗巢穴剿捕盡絕以靖地方若再延緩觀望
致悞軍機定行一體叅劾不恕抄案依准呈來

督厲將士案

一為征剿逆番事據分巡川西安綿兵備二道呈報
斬獲番級共六十顆并燒燬碉寨緣由前來看

有斬馘番寨俱已震驚破竹之勢易乘犁庭之
功可必但恐人心易驕賊詐難測萬一死灰復燃或
效困獸之鬪而銳氣不戢反致失律之凶勝敗判於
頃臾禍福誠為重大合行嚴緊隄備奮勇剿除以收
成功除本院不日撫臨親行督厲外為此案行本官
即便嚴督各該將領官兵務要精詳間諜造次不忽
乎隄防鼓作軍兵巢穴務期於掃蕩渠魁就擒醜類
盡殄一雪居民之積憤以求邊徼之寧塵仍查各該
將領頭目孰為用命効勞屢有克捷孰為偃蹇抗令
驅策不前逐一查明分別候本院撫臨開報以憑擣

賞罰治施行俱毋違錯未便

督責擒拏魁首案

一爲征剿逆番事節據副總兵官何紳稟報功級前來及稱將領據忠官兵効死所向無敵諸番震恐此誠前此所未有之軍威亦前此所未有之幾會也乘此極窮巢穴盡殲魁首雪居民不共戴天之讐言貽邊徼數十百年之安庶足以宣 朝廷之威靈而竭臣子之忠赤此本院日夜之所拳拳者所云固可乘破竹瓦解之勢遽難施搜剿絕種之力又賊首屢懇投降本職未敢遽從似猶逆慮險阻之難行過爲持重

之至計且不欲盡殄其類也然古人云去草不去根終當復生擒賊先擒王乃爲勝筭今劇賊黑殺等倡亂稔禍荼毒生靈神人共憤王法不原猶豫之間謫計易行萬一致有踈虞將來終難安枕關係禍機非小小也昔杜預破吳江陵所向風靡人猶有以百年之寇未可盡剋宜俟東冬更爲大舉者預曰昔樂毅藉濟西一戰以并強齊今兵威已振勢如破竹數節之後皆迎刃而解無復着手處也遂指授群帥徑進秣陵所過城邑莫不束手吳遂以平今蠢茲大羊之衆已如釜中之魚偷存喘息翦滅不難務須鼓衆

入直搗猱狻之穴用間設竒必獲豺虎之雄使噍類
不遺孽身盡斬然後將地方事宜別行處置徐議班
師其將領陞賞軍士犒勞必當破格酬勞決不空言
相誘仍多方督諭以作士氣用收全功其一應大小
事情仍逐一擬議差官赴軍門稟白施行

行何總兵擒拏黑殺案

一為征剿逆番事據副總兵官何卿報稱生擒白石
又除逆番之一害功誠可嘉但云傳令同名黑殺執
旗投降又云壩底一哨先掣營壘此則本院所未喻
者蓋前案所云擒賊擒王專指黑殺一人非謂其他
小醜蓋攻陷平番者黑殺也與李保分平番者黑殺
也擄提督丘仁者黑殺也既而送還者亦黑殺也姦
占丘仁之妻者黑殺也今又送還者亦黑殺也敵殺
指揮曹思者亦黑殺也其他同名者固未可知若見
在之黑殺則實一禍倡亂之人衆所共知者也夫黑
殺而果真也則一法所必不原天討所必不赦本院
固不得而釋之尤宜亦不得而釋之如其非真也亦
當解赴本院鞫審明白然後從而宥之則名義既正
有以服遠近之心而禍本不萌可以弭邊疆之釁
朝廷之威德用昭而臣子之職分斯盡矣今徒以狡

猶難獲陰結救援而乃聽反覆之言以為容縱之地
將來荆榛之孽復萌豺豕之毒隨肆其禍有不可勝
言者本院素習儒書未諳韜略非欲窮兵黷武惟在
靖患安民今與本官從長熟計如黑殺果非真正首
惡日後果能保其不畔餘孽果不復作聽本官結呈
本院仍將黑殺解赴本院以憑審擇即日罷兵如真
黑殺而謂非黑殺或不能保本惡之不復畔不能保
餘孽之不復生則本官雖欲罷兵在事體亦難輕聽
又云斬草除根懼用兵慘毒之大忌其言似矣殊不知
知止戈為武故討亂以安民所殺者少而所生者衆

此天地之大忌而聖人之所禁乎故曰仁者愛人
故惡人之害之也義者循理故惡人之亂之也此先
王用兵之本意也昔曹武惠王征伐四國亦云自吾
為將殺人多矣但未嘗以私喜怒妄殺一人故功名
顯著子孫昌盛世莫與比亦非謂其不殺也即欲樹
德子孫不於武惠之法而誰法乎且古人所忌於殺
降者亦云脇從之衆豈在倡亂之魁如陷城殺人橫
行無忌而皆以降免則征討之兵又何以得正渠魁
之罪乎况今之黑殺但聞約誓要盟未嘗束身繫頸
誠心投降者必不如是此在敵國尚不見信乃以堂

堂之 天朝而待撮爾之小醜明知其詐而故聽之
非計之得者也又節奉 欽依俱要真正首惡孰敢
輕易背違緣此舉在衆人議論甚多在地方關係最
大如地方遂寧餘孽不作固難語掀天揭地之功倘
首惡縱釋餘孽復興尚不免罔衆欺 君之罪本院
身任其責不得不為深長思也以本官之老練智過
孫吳曾藏韜略何所不解惟再加籌策以畢勝筭以
收全功庶幾成同舟共濟之義而本院亦賴以免憤
事之誅矣為此案行本官照案事理即便處報施行
毋得違錯未便抄案依准呈來

行何總兵招撫漢人案

一為征剿逆番事訪得虜入番寨男婦見存者尚多
日日久頭面改變懼怕官軍妄殺要功以致進退無
門填委溝壑若不招諭歸還未免逃生者橫罹鋒刃
而遺存者仍助為逆既違天地好生之仁亦非
長久之計合行下令招撫為此案行本官照案
即便製造白旗數面大書招撫漢人字樣於
路口插立選委信實官負監守但有投至者下漢人
男婦就便押赴營中親審明白解赴本院發落以將
各委官招撫過姓名數目逐一開報以憑旌賞本官

仍嚴禁各該將領官兵不許暗行亂殺希圖功賞如
仍故違妄殺者用心察訪拏解本院問擬抵命決不
輕恕招撫盡絕方許分兵搜山刻期班師俱毋違錯
未便

行何總兵刻期班師案

一爲征剿逆番事節據軍中報稱白草番蠻巢穴盡
窮已成掃蕩之績渠魁就執遂收萬全之功在各邊
固所罕見就西蜀亦未前聞但念從征將士久頓虎
狼之叢身不解甲共炊風露之下食匪充腸已踰月
而浹旬真捐軀以報 國本院每於嘉賞之際深懷

憫惻之心除副總兵官竭節盡忠自能體亮外其餘
將領軍兵擬合通行曉諭爲此案行本官照案事
通行各該大小領兵官知悉仍令徧召所部軍兵備
將本院憫恤之意再三曉諭俱候班師之日應宴待
者以禮宴待應犒賞者逐名犒賞奏凱遣歸以酬勞
勩本官仍將漏殄餘惡分投搜捕經略事宜從長議
處呈詳本院刻期班師俱毋違錯未便

燕勞從征文武官負案

一爲征剿逆番事照得本院欽承 明命征討逆番
賴上下之同心兼將士之僇力用兵僅踰一萬爲期

不越五旬翦除數十寨之群兇蕩平二百年之禍本
邊徼廓清神人胥慶維茲文武諸司大小僚吏或矢
石馳騫或帷幄運籌或控制四境或督發三軍凡有
事於戎行皆共効乎勞勩乃者還師還役斬馘獻俘
宜陳燕饗之儀以共安寧之慶式稽重典用勸將來
擬合就行為此案仰分守川西道除見在官員俱列
席宴待外其餘三司各道與大小文武官員凡應與
而未與者備細分別等第將宴席花紅等項逐一開
列議呈本院仍備云案驗分投齎送以酬勞績仍將
與燕官員及用過各項錢糧備細具由繳報以憑
考施行毋得違錯未便

芝園別集

公移卷之四

咨利弊以便興革案

一為咨利弊以便興革事本院欽承

命撫



蜀恐政事之未備思究良圖念民生之多艱欲加拯恤但土疆既非素歷而耳目又難遽周若非廣為諏詢何以便於注厝是用旁求以資不逮為此案行都布按三司守巡各道即將所屬地方官吏軍民一應事宜悉心擬議要見武備何者當修保障何者當設賦稅何者當均力役何者當節冗官何者當裁冗費何者當省奸弊何者當釐廢墜何者當舉何者宜於

昔而不宜於今何者便於此而不便於彼或稽諸衆論之公或得於試驗之的各陳已見毋事雷同有裨公家毋為避諱務求遠大之猷以副僉謀之望定限一月以裡條具申呈并開揭帖差人馳報以憑酌議施行毋得虛文搪塞未便

通催興革利弊案

一為咨利弊以便興革事案照先為前事已經通行都布按三司守巡兵備各道成都等府州縣各將所屬地方官吏軍民一應事宜悉心擬議刻期申呈去後止據灌縣崇寧縣議申前來其餘俱未回報為照

冬司庶官均奉 王命以撫疆域當以地方之利害為已利害以百姓之休戚為已休戚苟使少有裨補自宜不憚煩勞蓋平君體 國之忠今日匡時之略胥於此焉見矣今咨詢既久而曾未有以告豈以本院為不足圖事耶抑亦有待而為耶夫民生之艱苦無端政事之得失不一其間或因幾會之難乘或因遷代之靡定欲為之而不遂者多矣凡我有位宜為拯溺救焚之圖以成同舟共濟之美擬合通行催取為此案仰都布按三司各道即便查照先今案驗內事理一一作急對款議報各具申呈揭帖差人齎送

以憑裁酌施行

祛積弊以甦民困案

一爲祛積弊以甦民困事照得本院蒞蜀未及三月然或稽諸案牘之詳或得於評咨之的土俗民風既已知其淑慝吏習政體亦頗究其隱微雖於彰善殫惡之化未能盡行而勅奸禁暴之令不容姑待蓋既富斯教乃先聖之格言不教而殺實仁人之深戒除一切救偏補弊通變宜民之事以次舉行外所有官吏之貪墨奸猾之侵漁積蠹已深爲害且甚先宜諭戒圖與維新用殄饕餮之風以蘇困瘁之衆合行開

款刊示禁諭爲此仰各府州縣官各查照後開條約一一奉行敢有仍蹈宿弊者或查訪得出或被入告發定行拏問重治不恕仍將發下告示刊刻板榜於本衙門首常川張掛曉諭每季終仍備云條款開立前件將禁革過緣由并察舉過奸弊類總申呈以憑稽查施行

計開

一禁貪官夫有司之設以牧民也牧而不牧罪已難逭况可復從而殘瘝之乎訪得各該州縣志於安民者寡而工於剝下者多姑舉其槩間有

分用里甲之弊如掌印官分用幾鄉佐貳官分用幾鄉常川在衙答應百需是供以為固有有無事銷馬之弊各州縣里甲馬匹差撥遠近俱有顧貸定價貪官嗜利假以遠差名色撥出二三匹甚至十匹折價入已日以為常有倚官販賣之弊或將自喂猪羊發出祭祀等用倍科里甲或將原藉土宜發鋪變賣倍科鋪行有取索下程之弊日於里甲索取下程鷄鶩魚米米麵果蔬油燭柴炭心紅紙劄無物不備有隨行供給之弊有司以事出門即令里甲備辦飲食隨處供膳有庫役買辦之弊府州縣歲設庫役收掌錢糧出納今乃責之供應堂上與各佐貳首領官心紅紙劄圍裙坐褥油燭柴炭茶果麵糊等項併各保頭房錢每一役半年本戶有使用二三百兩而不足者徃徃受累傾蕩家產十而八九有拆毀公廨之弊各有司去任輒將原住公廨或拆毀門壁竹木炊爨或暗將門房窓榻送人變價奸弊百端豈能悉數徒知恣已之貪饕不顧朕民之膏血有人心者忍為之乎仰各該官負將前項積弊盡行革去有一於此即以贓罪

問革敢有仍前踵習者許被害小民即便指實
赴院陳告以憑拏問其庫役止令看守庫藏不
許責令買辦其去任官真有拆毀公廨者掌印
官即便拘留申夾提究

一禁奸吏查得川中吏役積弊甚多難以枚舉有
捏故復役之弊如中江縣吏張友先年問該枉
法充軍久提不到今父張永安見在却稱已故
一憂起復希圖着役已問口外為民又有躲避
房分願告罷役後又捏故告復事不同而奸詐
以規利則同也有包攬夫馬之弊如某處之

董鳳榮違例包當夫馬已問充軍其各州縣兵
房該吏因官有乾銷亦徃徃包當里甲夫馬利
歸一已而差累小民有管收錢糧之弊戶房該
吏通同貪官管收邊腹錢糧多收火耗侵欺入
已指稱分例嚇詐害人公門視為虎狼百姓畏
如蛇蠍雖事發問遣而為害已不小矣有科派
紙張之弊日逐書辦紙劄筆墨官吏不行自備
一槩派取里甲一有造報文冊乘機濫科因而
侵刻入已此皆法外之積蠹也仰各有司掌印
官負即將前項奸弊嚴加痛革不許仍前姑息

寬縱如違官以不謹劾退奸吏拏問發遣

一禁濫受詞訟訪得所屬有司但遇小民訴訟不
拘事之輕重理之曲直一槩濫受其佐貳首領
亦違例受詞詞一到手即差積年光棍徧入鄉
村照名科取紙贖通不問理間有問理追收紙
贖報官者十之一二侵尅者十常八九或抽抹
文案或假作的決惟知規利是圖不顧虐民之
慘相應通行禁革今後有司掌印官凡接受民
詞務審情有冤抑及事干非法者方許准理止
令見年里甲拘提到官俱要從公問斷有罪者

依律議擬仍審願納贖者納贖願的決者的決
供明者免紙明白發落其有無論小事自願和
息者令寫和約三張上書二家爭告及願和情
由到官判印原被告各給一張官收一張粘卷以
防日後番異佐貳首領不許擅受民詞雖職掌
有關亦必掌印官准發方許問斷敢有仍履前
弊濫受民詞恣意科罰者定行拏問賊罪革職
一禁包攬里甲照得當年里甲止為勾攝公事催
辦錢糧其間乃有包攬之弊蓋村落之民多朴
實市井之民多機巧故積年光棍或書筭皂快

人等於接役之時輒便下鄉百般恐嚇誘哄包
寫其走遞夫馬以一稱十日逐文應以十稱百
又因而誑騙使費銀或一日六七錢有之甚至
一兩者有之接役未幾見撥夫馬重疊輒就躲
避致悞應役重拘小民罪累不勝又有強上官
物之弊每遇新里甲應役之初該上鋪陳馬匹
或祭祀應出猪羊亦被前項市棍積年用強納
官加倍收討貪濫官貧莫能禁制蓋已既不潔
何以繩人此民困之所由滋也今後各該有司
遇里甲接替之期務要審實正身無有包攬方
許更替敢有積年棍徒再蹈前弊照例問發充
軍官以罷軟問黜

一禁設保頭及差人下鄉訪得有司起徵錢糧積
弊有三如拘排年投到每一名輒以刷印由票
為名各令納紙一刀又令每里取保戶一名保
領方纔立限完納保戶承保之後每排年一名
索要保頭錢或一兩二兩多寡不等此其害一
也又立限未及半月而輒差快手與同保戶下
鄉催徵雖牌差一人而勾引遊食棍徒三五人
拘喚勢如虎狼動輒鎖項凌辱奪毀器物每名

索要鞋腳錢三五錢或一兩以上方行寬鎖此
其害二也拘至衙門皂隸通同保戶索要行杖
常例該房與管糧廳吏書通同保戶索要寬限
常例此其害三也排年不勝受累小民因之重
科以致家業破蕩錢糧不完者多矣仰各掌印
官即將前項保戶革去每遇錢糧起徵定立限
期預先出給告示于本衙門并鎮店鄉村人煙
去處張掛曉諭各要依期親自上納不許棍徒
攬秤及市戶邀截逼還私債仍省令排年依限
赴州縣查比違者責罰不許仍前差人下鄉騷
擾敢有故違者從重究治

禁擾保甲查得各州縣保甲之設專為防禦盜
賊近訪得各該有司掌印并佐貳首領官負奉
委踏勘災傷或因清查塘堰或因檢驗屍傷或
因追併錢糧隨帶吏書門皂人等一二十人下
鄉駐劄各堡供給俱出保甲仍百計需求上宜
又令各備夫馬一堡遍送一堡小民受害莫可
誰何以致因而將原設堡寨廢弛便賊盜易生
貽害地方仰各該有司務照舊規於每五里設
一堡因地定立其山谷深僻住居星散者聽從

民便相度地利相依居止互為保聚編十夫以
為甲置一小粉牌開具各家姓名人口及所務
生理僉驍勇小甲一人以領之編十甲以為一
堡置一大粉牌止開具各家姓名擇公正堡長
并總甲一人以統之其四方遠播之民佃田居
住有地主管束者一體編入保甲如來歷不明
及無底業者不許容留同堡之人各備堅利器
械以時習武一遇有警鳴鑼擊鼓以相號召各
堡齊舉或分布策應或據要扼截或并力救援
其有懈弛失事者如一家失一物則公罰于百
夫之內賠償務使地方寧謐每月朔各堡具執
結止令堡長一人赴掌印官處投遞其各該官
負奉委下鄉遇晚止許歇宿寺觀自備飲食不
許仍前駐劄各堡亦不許巡捕官前去點閱騷
擾鄉民如有仍蹈前弊定行拏問重究其上司
及使客過往亦不許責令號召迎送

一禁冗費查得各州縣將空閑分司及府館案衣
坐褥圍裙傘轎等項什物不分有無朽壞責令
里甲一年一換因以舊物歸已又於冬至立春
正旦開印及節日各令里甲設酒張宴以為娛

樂又里甲接役之初各於本州縣上新硃盒筆架紫衣等項間有越分妄為三時則令用綾段夏月則令用絳紗者又有司以事出門擅作威福張列旗號吹打響器曠日持久驅之遠涉計一夫工食所費不貲因而加倍科歛各戶首又有使客過往盛張筵宴糜費民財者又春秋祭祀有勒要頭猪以百五六十斤為限頭羊以六七十斤為限有不如數因而折罰者又鄉飲二次有生員同堂預飲各收卓席者有雇債卓椅大小家火費用無經者此於禮制既有不愜小民日加橫斂方遂其口腹耳目之欲而怨氣已滿腹矣豈能安享之乎至於非禮以行人則尤在所得已者也今後各有司掌印官即行查照省改可儉約者儉約可裁減者裁減可修用者修用可借倩者借倩慎勿仍蹈前弊以速重懲

一禁戶首科害照得川中戶首有因殷實部運錢糧而分派盤纏數多者有起程至途而又令人復回科派者有因編差役假稱饋送官吏買求輕役而指一派十者有因應當皂快等項除工

食銀外又通同戶首加派一倍侵分者及至應
當三月就告熟衣料派一番至九月又告冬衣
料派一番又有指稱各項使用揭借銀約本役
費一而指十戶首因十而料百是以拘喚無寧
時刻剥無虛日此皆小民之大害也仰各嚴行
禁革今後如有前項積年通同戶首再襲前弊
者即便擒拏從重招詳有首告者倍與追償
一禁包攬截納及侵欺錢糧訪得各衙門無籍之
徒凡遇本州縣催徵錢糧交通吏書充頂正身
將應納錢糧承認替納輒行下鄉加倍取討應
納人戶懼怕入城只得曲意順從恣其漁利
府州縣儒學二倉糧米并審編徭役各部料價
戶口鈔銀館夫扣夫鋪陳等項銀兩雖亦編有
大戶庫子多係積年棍徒預賄該吏無派及派
役之後輒私置加大等斛面加倍秤量
不從動輒捏故稟官重責其錢糧俱
收掌任其侵費官吏通不追究間有
而子又代收者有子監併而父仍代收者延捱
日久又行脫訴奸弊百端無所不至今後邊腹
錢糧俱要排年率令小戶親自上納不許光棍

堯攬截納其一應均徭等項錢糧各量州縣大小銀米多寡掌印官臨期從公酌量編定殷實名數責令當堂收受俱要當日收入倉庫登記官給流水納戶給與官帖執照如有仍前容縱者當該官吏併行拏問不恕

一禁看倉老人并斗級侵欺查得各州縣預備倉老人并斗級經收一應人犯紙贖米穀及秋成糴穀備賑緣老人本為監收之設而多以奸猾充役為害甚于碩鼠計羨餘則折乾掩折能則插和收今年以遮上年之拖欠盤束倉官告

之折筭踢斛淋尖大斗而出小斗唱籌執簿備上手而掩下手事發問罪則扯斗級以分贓受貼得遂又甘拘繫以望宥至於斗級編自均徭亦有光棍包攬商串老人通同該吏每遇罪人上米暗行折價充私假稱收完虛出倉串官為故縱若罔聞知今後即將前項奸弊務要痛加稽查不得似前蹈習如違連坐重罪

一禁起滅詞訟之弊查得川中光棍專一合夥同謀教唆起滅或假寫呈狀硃筆標點詐糴公差下鄉嚇取害人又或有慣訟遊民告縣不准添

捏別情告府告府不准添捏別情告上司一售
其欺輒將被告多方恐嚇或在中途講和索財
買免或指稱使用受賄休息其不從者或拘繫
經年逃躲不結或扶同硬証致陷非辜生理由
之荒廢老幼不得寧居良民受害莫此為甚仰
各有司用心稽察凡受理詞狀必要明開代書
之人及該管里長如本院准行或各衙門受理
者亦一體詳審但有前弊將原告痛加究治問
擬充軍以懲奸惡

一禁田糧戶口之弊照得蜀中丁糧積蠹尤甚

豪賈往往徂虧價減糧及至大造黃冊又不照
數開收田地悉歸大戶而糧差日累貧民此其
弊一也又私賄里書脫漏丁口至於應甲首當
差徭悉以照丁為則大戶丁多之家或五七人
朋一丁或八九人朋一丁甚至一二十人朋一
丁偷安避役若所當得丁少者獨累產廢不免
流離逃亡者不除里長代為賠贖此其弊二也
其絕戶田地有被大戶奪買者有被里長吞併
者有被佃戶隱匿者遺糧無歸或衆甲均陪或
積逋連年此其弊三也通年審編均徭照依實

徵黃冊不論業之厚薄丁之消長且又信任吏胥書筭高下其手大戶益輕而小民益重雖有均徭之名而無均徭之實此其弊四也凡此數端實作奸之鬼域害衆之螟蟲祛除不力而欲寡弱之安生難矣仰各有司嚴行查革一一着實舉行其欺隱田糧脫漏丁口定立限期許令自首免罪改正如有不遵或被入告發或查訪得出仰從重問擬仍將田產入官本院定以察舉之多寡為各官之殿最慎勿視為虛文

一禁民間積習之弊蜀中奸弊濯髮難數姑舉其大者有納銀陰醫義官營管巡捕等差荼毒小民挾制官府出入囑托并濫免差役之弊有解戶侵費錢糧貽累戶丁追賠之弊有保甲圖賊賣盜妄拏平民之弊有沿江渡子勒財害人故將人畜沉溺中流之弊有鋪兵擅開官封沉匿公文之弊有長江船戶圖財害命之弊有地主窩盜縱令劫掠之弊有土豪大戶違禁取利准折田產人口之弊有無籍光棍略賣人口離散骨肉之弊有買賣貨物斗秤大小出入不均之弊有行使假銀欺騙良善之弊有僧道私自披

剝及窩藏奸盜扇惑人心之弊有婚姻不正或
男子方幼而輒娶長婦或夫屍未寒而遽適他
人或母女姊妹同歸一家或兄弟叔姪接收妻
室亂倫黷禮之弊各該有司嚴加禁革上去
七八者為上考十去五六次之十去三四又次
之如一不如意則其不才斷可知矣

一禁交界接境各處驛遞先年應付夫馬多
于交界處新設驛遞及無按等衙門巡歷地方

欽依通行禁革
應該應付夫馬俱止許於本衙門首伺候以免

民病今訪得川中不遵禁例仍一槩派發夫馬
於境上迎候曠日持久計一夫所費不止數倍
及期而不至或缺少飯米告回取討又突然率
至遂以失候迎接罪及官吏不但紊亂事體寔
為妨廢民業仰各該官吏遵照今後遇有上司
及公使官員遣牌到彼止許摘撥官吏兵快于
境上迎候其夫馬俱于本衙門首伺候毋得仍
前違例奉承輒撥夫馬迎候致妨農業

議處錢糧徭役條約案

一為咨利弊以便興革事據都布按三司守巡兵備

等道成重嘉眉等府州縣各條陳地方事宜到院案
照先爲前事已經通行各將應興應革事宜各呈報
去後今據前因看得各官議陳雖聞見所及俱於民
瘼相關而彼此異宜或於事體有礙欲求經久之計
遞難一槩准行除民壯驛傳塩課里甲夫馬等項事
關一省通行查處及事體重大者行布按二司守巡
兵備等道會議舉行其間窒礙難通或沉濫不切或
咨詢未的者徐爲采訪以漸措置外所有關係錢糧
并徭役者相應依擬處分擬合通行爲此除通行所
屬府州縣遵照外茶仰布按二司各道官吏即便
照後開條款着實舉行永爲遵守毋得虛應故事及
違錯未便其守巡兵備等道巡歷去處各要不時稽
查如有故違者就將經該官吏從重究問如律具招
呈詳施行各具遵行過緣由呈來

計開

一看得成都府并洪雅廣安等州縣條陳乞要嚴
行掌印官揀擇丁糧近上人戶選僉殷實名數
造冊送本府州臨期註撥一節爲照小民貧難
止供本等賦役大戶殷實收解各項錢糧此立
法之意均平之政也各省規則俱以丁糧近上

者僉於殷實設役之年各州縣先期查照黃冊
實徵并審事產充裕相應人戶計筭一年各色
錢糧該用收頭解戶若干名以丁糧極多者居
首其餘以次開列名為虎頭蛇尾用印蓋先
送本府或直隸州掌印官收掌但遇收解錢糧
該用大戶若干名各州縣具數申請該府州酌
量難易定名撥發並無編及小戶亦無朋貼盤
纏惟獨四川事體無定或以小戶輟糧編僉或
既派通里因而多科盤纏重取加耗良善者用
賄買免奸猾者設計包攬又人無專責坐觀成
敗一有不完編派衆戶以致侵欺營運往往而
是公賦積有逋欠而小民重致困累此不便之
大者也今如各官所議誠宜亟為區處仰各州縣
查照各原額糧米照舊一把連徵收其收解人
戶亦依舊規如一甲見役正辦則六甲收解錢
糧二甲見役正辦則七甲收解錢糧輪次之年
先期各州縣掌印官親查各甲黃冊實徵丁糧
數目并審戶則事產高下止將丁糧近上者備
造文冊以丁糧多者為首其餘以次開列俱審
取見在的名仍計該邊腹錢糧各若干該用殷

實各若干每名收邊糧以百石為率收存留以二百石為率一年殷實止穀一年錢糧不許有餘不足亦不許仍將小戶槩編及將槩里轉數俱掌印官親自審定佐貳管糧官毋得干與造冊既完用印鈐蓋呈送該府州縣掌印官封記收貯但遇徵收何項錢糧備將錢糧數目若干應用上等或中等大戶若干名具由申請該府州掌印官酌量難易親筆查註定名撥發該州縣拘令承認必須審實正身取具同戶并里隣執結不許冒名頂替如有此等事發之日一體問罪均陪不許仍於各戶科歛盤纏及加耗銀米仍刻期責取完納通關銷繳各屬務要着實舉行如違通行究治

一看得按察司并成都府條稱徵收錢糧雖是一把連起徵中間奸弊尚有未釐乞要置立格眼及由票與定立限期各一節查得糧儲事宜內開載收糧則例收銀收米二條立法周詳稽考精密行之可以無弊但各該有司多以科剋為先圖以錢糧為末務未及着實遵奉以致奸弊叢生合再通行申明仰各該掌印官今後徵收

稅糧查照奉到勘合照依原定一把連規則定
派數目出給告示曉諭知悉仍令不拘糧米多
少俱要各戶分門人丁自行上納如無夫男者
付與的親家屬代納不許排年并戶長兜收先
期責令各里見年里長督同各里書手備將本
里各甲人戶該納稅糧分門別種照則科筭攢
造實徵冊一本呈遞在官該州縣類造總冊首
開本州縣額糧次分起運邊倉腹裏絲花大布
存留但係折銀者勿論價銀輕重總筭一處查
照本州縣原額均勻攤派次將各排年里甲姓
名并各戶丁各應納糧米數目查明開某里某
甲某戶某門糧米總共若干備細查造一樣二
本掌印管糧官各收一本仍照數騰寫每里設
格眼簿一扇編記各排年里甲并花戶及門丁
姓名每一里統十甲每一甲統十戶每一戶該
各門若干用印鈐縫發各收糧大戶收掌仍將
各戶該納銀米數日照依發去由票格式備細
填寫先期給付各納戶查照每臨收之時仍另
給各經收入役空白流水簿曆一樣二本眼同
收糧官將一本收銀一本收米仍先報各納糧

人戶催頭姓名在官照前定立一日收銀一日
收米限期催趲小民花戶辦納經手管糧官於
收銀處所照前置設木櫃上鑿一小口將原降
天平支架於上令原定解某邊倉人役於中亦
用四名各執流水格眼簿曆分立兩倚卓上登
記如納戶兌銀不許絲毫羨重務要平秤管糧
官即照銀數於由帖眼下註寫某納戶上過銀
若干即時一一登記流水格眼二簿內本官各
用關防鈐蓋由票隨給納戶收回執照將銀拆
入櫃腹中至晚眼同收糧人役開櫃一總秤兌
若干查算流水簿內相對收過若干經收官於
流水簿收止處總批大字一行某日收過若干
將銀另箱裝盛封送入庫次日收米亦管糧官
到倉眼同各大小戶用原降印烙斗斛收量亦要
當時督令收米人役將各戶納過米數登記流
水及格眼簿仍填註由帖眼下俱用關防鈐蓋
由票仍付納戶收照第三日收銀四日收米俱
照前法每年定立三限每限以一月為率嚴催
收納每一限畢查納不如數者量將里甲責併
三限畢然後通查某戶某人已完某人未完方

令排年催頭勾催花戶到官比併若排年勾攝
不至及有賣放情弊方許差人押排年勾攝花
戶懲治若花戶逃亡即察花戶有無田地曾否
有人佃種明白追究又若一二日收足一倉就
解一倉仍遵照先邊後腹隨令銀匠每五十兩
下火傾銷成錠照常分別本折中半差職官管
押給付批文起運刻期赴倉上納將所收流水
筭清收過銀若干米若干就交付與第二倉接
解之人亦做此次序管糧官眼同收解若收銀
人負將納戶銀已秤兌不登流水不註實徵及
格眼希圖日後侵分者許納戶執帖或赴本府
州或近守巡該道徑自口告拏問經手人負如
律坐以監守盜論仍先倍追銀兩陪賞告實之
人如挾讐妄執者抵罪仍嚴禁不許管糧官索
要保頭并街市富豪乘此逼取私債其一應由
票紙劄見官常例保頭銀兩印色紅錢比較使
費寬限卯錢添封秤頭餘銀火耗截納利息替
陪落草盡行禁革督糧分守道仍不時吊取格
眼簿查考如奉行不到即便叅拏究治
一審戶首照得戶首之名各省所同而戶首之害

四川所獨蓋各姓朋戶者既無異籍丁衆糧多者亦不拆戶欺藏隱蔽習以為常而出官催科盡托戶首是以良善憚於應役光棍慣為包當濫派重徵指一科百谿壑之貪曾無厭足而豺狼之虐害及門庭本院稔知此弊雖經刊示禁諭去後但積習已深弊源日益未曾定議選僉戶首之法恐卒不能盡釐合再通行仰各該掌印官查照即便出不曉諭該管里甲大小人戶衆議家有底業良善服衆者推為戶首呈報在官責令專一催辦本戶一應錢糧不許指奪

歛仍定以一年一換如有前弊許戶丁首告照賊問罪另擇良善者代之毋得縱令積年棍徒幹充剋害小民各將遵行過緣由開報

一據撫治道條陳該本院看得四川陰醫義民等官率多市井無籍之徒初意營求差使侵騙錢糧故借貸以援例及至文引到手冠帶加身即夤緣而攬解私則指稱盤纏加耗重科疊派以浚小民之膏血公則撒秋營運買妾宿娼以侵在官之錢糧逋負連年追呼不及至事發究追多係蕩蕩無底業此輩不除而欲錢糧之完不可

得也節該前院禁革不許擅差陰醫等官攬解錢糧非不叮嚀告戒而所屬官負多不遵依如近據成都府申問犯人向九明等到院招係壁山縣義民管解嘉靖二十二年分成都廣豐倉糧通同解戶攬頭各將原解錢糧侵分隨即買妾費用縱問充軍監追陪償所完者無幾矣仰各掌印官即行遵照今後再不許差委陰醫義民省祭等官管押錢糧凡遇督運錢糧俱照節年禁例止許差委佐貳首領官負管解如本州縣缺官申呈該府定委隣縣或本府州首領通申本院并布政司定奪如違定將府州縣掌印管糧官叅拏究問該吏坐以贓罪不恕

一看得建昌兵備道條稱官斛與市斛不同官斛一石止有市斛八斗般實經收存留倉糧多以市斛收之民以官斛納之官方其收時必有加耗又於一石而刻落二斗良民多納奸猾得利乞要通行所屬較量均平相應依擬仰各該衙門掌印官即將市斛革去查照原降官斛較量均平置造印發收受錢糧并村市行使其前項倉廩若有棍徒仍前私用市斛收受糧米許

被害之人指實陳告拏問招詳

一看得成都府條稱本府所屬漢州德陽等各沿江州縣多有水衝田地各該小民雖累具告但止免雜泛差役其正辦錢糧未即除豁乞要委官沿坵履畝踏勘一節委切民瘼第恐他州縣或亦有之俱應查勘仰各該府州縣查委所屬州縣掌印官分投前去沿江節年被水衝崩去處逐一查勘要見某戶臨江田地若干該糧若干水衝成坎不堪耕種若干該糧若干水退地出猶堪耕種若干該糧若干并查某戶新漲江

田或新墾山田受種若干堪補崩坍稅糧若干一一勘明取具里隣甘結造冊申報以憑覆議施行

一看得敘州府并達州德陽等州縣條陳力役之差審編銀兩多寡不等多被積年用計包當一入其手則加倍巧取財物至若巡司弓兵專為盤詰奸細緝捕盜賊近來巡司官吏多不畏法無緝捕之功有生事之害或詐商旅以局騙或通積年以強攬或索取見面或包納工錢小民受害莫此為甚乞要將審編銀兩徵收在官准

募相應准擬除驛遞水馬夫館夫民壯另有議處及布按二司皂隸庫禁等役行令革去正身一體解銀雇募外仍各掌印官即將前項審編看司門子鋪兵弓兵并渡夫等差除已應役外以後自二十六年為始俱徵原編銀兩在官如弓兵則量加器械銀一兩鋪兵則量加旗鑼銀一兩看司則量加衣鞋銀一兩其布按二司門子皂隸鋪兵庫子禁卒止照原額工食不必增添俱作銀差扣定數目混徵銀兩在官不許逐戶定立各役名色每遇年終更清一次

考兵門子俱照數解赴各衙門查照雇役其看司鋪兵渡夫查拘附近人民責寫認狀及四隣保結在官常川應當將前項銀兩盡數給領不許私下包攬頂替仍嚴禁不許分外科索勒要親當其弓兵工食銀兩解各巡檢司官吏查收就彼雇募底業良善之人亦取隣右保結一體給發應役不許侵剋入已缺少原額數目今後務在緝捕盜賊盤詰奸細不許似前科取見面銀兩并索客商貨稅等項敢有故違從重究治仍將遵行過緣由申報

一看得重慶府條稱各驛通衙門有奸人棍徒包攬夫役不容正身親當者誠為可惡但百姓本戶無人則不容不雇情況驛通衙門於習熟峇應慣曉水路之人亦不可少若通拘正身親當不惟理勢難行而迎送催辦亦非鄉民所能濟也今上司委官查驛通但恨包攬之可惡而未察其情由一槩盡問重罪乞要明開雇倩一節相應准行仰各有司及驛通等衙門各一體查照凡有鄉民丁單力弱或不慣承應願雇倩者聽但查有包當多者問罪包當不着役而誤事者問罪輕則量追工食入官重則坐贓充徒若有不容正身親當而用強包攬積年把持衙門傷害官民者定行照例發遣決不輕貸

一看得富順縣條稱各項力差如鋪兵本為遞送公文而設今則令其買辦中火器具看司本為看守衙門而設今則令其修整案衣什物禁子本為看守獄囚而設今則令其出備刑杖鎖鑰看廳庫子本為看守庫藏而設今則令其供給心紅油燭鋪陳庫子本為收管鋪陳而設今則令其雇募鋪陳傘轎良亦偏累乞要將刑杖心

紅之類比照見今本省通行事例於犯人名下
紙銀內扣買鋪陳什物之類查有欠缺損壞估
計申請於無礙官銀內動支置造相應通行查
革仰各該掌印官即將前項夙弊嚴行釐革今
後鋪兵止令遞送公文看司止令守管衙門禁
子止令關防獄囚庫子止令監守庫藏其應用
刑杖鎖鑰心紅茶果油燭之類每月議定數目
許將紙贖銀兩支用其案衣什物鋪陳轎傘等
項若有欠缺損壞即行估計申請置造仍各具
由回報

看得洪雅縣條稱差徭俱照丁糧編派中間不
拘練丁當差固有而止照祖房不練丁者亦多
惟不練丁以均差如一房二三十人止當官丁
一二丁者有之亦有一房兩三人亦當二三四
者有之又有戶族豪強暴弱凌寡詐冒巧取以
包己身孤子寒丁日侵月削困於誅求乞要通
行所屬除軍役照房外其差徭鹽課科派俱令
照糧練丁軟臺不許照房一槩靠損乞行遵照
永為定規一節相應通行仰各該掌印官出示
曉諭今後差徭除軍役照房外一應差徭鹽課

及別項科派俱令照人練丁通融軟臺不分有
無報冊不分彼此異門通以一户之丁朋當一
戶之役不許仍前分門坐派偏累孤貧仍將遵
行過緣由開報

一據郟縣條陳該本院看得寄庄田土蓋以此縣
人民買彼縣田地稅糧難過此縣故就於彼縣
立戶納糧當差故謂之寄庄不付已也近來民
間奸偽日滋畏避本處差役各處差輕多
將原籍田土變賣轉買鄰近州縣產業以為規
避也又或官舍射利依親置產或投托士夫借
名立戶以圖倖免二也寄庄日增則脫差日多
脫差日多則居民益困若不禁止弊將何極查
得嘉靖十七年欽奉 詔書內一款各處軍衛
官舍人等置買民田往往不肯納糧當差不服
州縣勾攝致累糧里包陪着撫按衙門并管糧
等官明白榜諭今後一體坐派糧差不許抗拒
違者原買民田追奪入官欽此欽遵外今據各
縣條稱前因委實切於民瘼仰各州縣遵照將
各里寄庄人戶田土盡數查出不分官舍人等
通與土居人民一例當差凡驛傳民壯均徭里

甲火夫之類俱不得脫免如係士夫例該優免者止聽於原籍優免不許重復於各縣寄庄援例濫免虧官損民如有阿諛奉承者考以罷軟罷黜

興革利弊各項事宜案

一為咨利弊以便興革事據都布按三司守巡兵備等道成重保順嘉眉等府州縣各條稱地方事宜到院案照先為前事已經通行各將應興應革事宜各呈報去後今據前因看得各官條陳有切當民情可裨政體者相應依擬處分擬合通行為此除行所屬

府州縣各遵照外案仰布按二司督糧清軍守巡兵備等道即便查照後開條款着實舉行永為遵守毋得虛應故事及違未便其守巡兵備等道巡歷去處各要不時稽考如有故違者就將經該官吏從重究問如律具招呈詳一行各具遵行過緣由呈來

計開

一看據四川布政司王布政條陳一應罪囚除情真罪當照舊外其餘自徒罪而下或以追贖未完囚禁日久往往坐斃合無自今但追贖二年以上者即行的決釋放為照除奸禁惡本非得

已宥過恤刑自合並行故因圍非生全之地而淹繫豈仁人之心所據前因相應依擬仰各該掌印官即便查照今後遇有徒罪而下追贖人犯除有還官入官給贖贖物難以釋放外如止是贖罪未完監至二年之上完辦不前即行申詳原行衙門改擬無力的決發配釋放寧家毋得仍前久禁致傷天和各將遵行過緣由回報一據王布政條陳該本院看得左道惑眾所在有之而惟四川為甚僧道遊食所在有之而亦惟四川為甚蓋此輩口稱邪說惑愚民奸淫婦女窩藏盜賊耗財帛以養奸徒塗耳目而壞風俗至於今日極矣律之正法皆當盡數捉拿依法問斷或問遣充軍或坐擬極刑以回薄俗但干保人無昏迷已久而化導轉移亦當有漸所據本官乞禁邪術以弭禍亂誠為善俗安民之首務也及查法家要覽凡僧道為事須先問有無度牒以便論斷今四川僧道給有度牒者十無一二私自簪剃者十常八九近駁行分巡川北道呈詳問得犯人圓通招係閬中縣故民張會男先年與同保寧千戶所故軍沈偉男世連

周全男世春沈廷甫男覺任郭倫男祖通并本
縣故民張鐸男會通楊志成男淨朗鄭祥男鄭
圓兒各不合私自披剃投入本縣觀音等寺與
故僧永觀等為徒則其餘寺觀槩可知矣各該
衙門問刑亦多不究此致律禁不行殊非詰奸
防偽之意仰各該衙門通行嚴禁凡有師巫及
淫祠扶鸞白蓮告斗遊食僧道等項各要即日
改革俱務本等生業毋得仍前非為誘惑良民
敗壞風俗敢有故違者即令巡捕人負緝拏究
問招詳各該僧道除原有度牒者照舊焚修外
其原無度牒者許令其實首官改正姓名還俗
准將承受僧道田產給與管種為民當差如若
不遵被人首告者本犯問罪還俗仍將財產給
與首告之人充賞今後各衙門問刑但有僧道
干犯者不論有罪無罪俱要先審有無度牒明
白開具招詳以憑處斷仍將禁諭及奉行過緣
由回報

一據分巡川西道并洪雅達州等州縣各條陳該
本院看得川中人民多係各處流移之人或被
荒就食或商販虧本或脫逃軍匠亡命藏奸或

假托醫卜教唆害人或投托土官撥置生事或
哄誘番夷引惹邊釁或積財置產而匿稅避差
或投附大戶而糾合為盜或以利債而准折貧
民之田產或以富豪而姦占良人之妻女奸詐
百端無所不至誠地方之大患不可不急為之
驅除者也仰所屬各掌印官查照各官所議即
將各處流寓之民責令各該里老督同地主逐
一開報姓名各係何處籍貫有無給有文引因
何生理前來寓住幾年有無置有產業若干曾
否附入冊籍其置有產業未經入籍者准將隨
帶人口及見有事實產豐厚者逐一開報認編某
里正圖甲首其事產涼薄者認作某里畸零人
戶俱類造手冊候大造之年一體查入版圖仍
就編入保甲如無置立產業給有新近文引者
准令地主店家保認容令在彼買賣如既無事
產又無文引及執持老引者俱勒限回籍但有
潛住者拘拏問罪遞解原籍收帶當差仍備將
收籍正圖畸零人數若干與有引容留買賣若
干無引遞解原籍者若干開列等第備造姓名
數目申報

一看得順慶府條稱川俗府州縣新官適任屬下
皆以水手下程折乾相迎類皆取之於民乞行
禁約此不惟擾民於無端抑且陷人於不義貪
墨之風誠宜痛革仰各掌印官即將前項宿弊
嚴行革除毋得仍指以迎新送舊及朝 觀考
滿為名科歛水手下程折乾銀兩上下交征有
干清議如有故違與者受者一體坐贓黜罰不
恕各將遵行禁約過緣由開報

一看得達州巴州遂寧等州縣各條稱乞要修築
塘堰以備旱澇為照民以食為天而耕種以水
利為本以有備而待非常以人事而助天道誠
不可一歲而闕者也但水利之政各省莫不舉
行而四川乃獨盡廢一遇旱乾束手待斃職此
故也仰各掌印官即查本州縣原額塘堰若干
逐一查出除堅固可以積水者照舊外其倒
塌水崩者作急督令塘堰戶如法修砌其原無
塘堰者或共出田地若干或朋買田地若干各
隨民情所便開塘設堰以資灌溉仍舉立堰長
或保長有行止者督理其間如溪澗相隣者或
挽以筒車或汲以龍骨務使旱乾有備秋成不

失掌印管糧官不時親往相驗用心督率稽其勤惰而勸懲之不許因此科罰及濫委管堰老人騷擾或指稱造冊使用科歛各將遵行過緣由申報

一據峩眉縣條陳該本院看得吏舍之設所以關防出入禁革奸弊也四川所屬州縣徃徃廢弛不修以致各該吏典俱在街市租賃民房居住文書藏於私家出入全無禁制官司之令未布而消息已徧於閭閻刑獄之案未成而輕重皆由於賄囑是縱吏與外人為市也此豈為政之

體乎今據該縣條陳相應通行查理仰各該掌印官各查六房吏舍有無見在如已修理堪以居住者不必更動以費民財如原木修理及倒塌無存者即便估計合用木植瓦片工食各用銀若干應動支何項錢糧逐一估議呈奪

一看得閬中縣條稱本縣設有院司衙門什物甚多間有朽壞不堪僦賃半物之價價虛費而物仍歸主乞要估計用銀置造一節為照凡民之治家也克勤小物而筭無遺策有司之治官也任其浪費而莫為經紀即此一事可以知處官

之不如其家愛民之如其子矣今據所陳委
屬相應仰各該衙門掌印官員各查該衙門院
司應用什物間有朽壞補造若干件俱要估計
明白共該用銀若干具由申呈本院動支無礙
銀兩置造仍置大木牌一面上刊某項物幾十
幾件并置買價直就令看司收執如有損失責
令陪補不許科派里甲產賃虛費民財違者查
出究治

一看得成都府條稱本府所屬州縣近年春秋
祀鄉飲酒禮原編均徭銀兩足勾買辦冬
官員不知節省分外又令里甲幫補猪羊增添
品物煩費下民乞行禁革一節查得先批行提
學道呈議邛州鄉飲設有禮生酒席出於無名
乞要裁革已批依擬通行以肅典禮用悖士習
有不遵者該道巡歷至日查訪究治去後今據
前因相應通行仰各該掌印官查照今後春秋
祭祀鄉飲酒禮俱止照依原議編均徭銀兩買
辦節省冗濫成禮而止不許分外科派幫補如
違查出官吏坐贓治罪

一看得浦江縣條稱川中賣田告求賞給至於嫁

賣妻女亦然乞行禁革一節為照田產之買賣
價直之高下有中見之說合憑彼此之聽允交
易一成即難變易行之天下皆然惟四川刁弊
有先年賣絕而取賞給於數十年之後者有祖
父賣絕而取賞給於子若孫者以致紛紛爭論
訟端不絕風俗之壞多由於此仰各該掌印官
即行出示禁諭今後凡有出賣田地房產者如
原非利債准折及用強逼買不許捏詞妄告賞
給其嫁賣妻女者一體禁革違者痛加懲治
一看得定遠縣條稱本縣申明旌善二亭老人原

置非人流襲到今乞要減數選充舉役革去舊
役非人一節為照旌善亭者書民之善良者於
中而旌之以示勸也申明亭者申明朝廷之
禁書民之不善者於中而恥之以示懲也今此
意廢而不講而所設老人則用之取供用之勘
事用之管修造用之解錢糧而某人又皆市井
無賴之徒鼓弄唇舌浸潤官長為侵財之鼠蠹
作生民之蠹賊三五成群把持官府所宜亟除
以肅政體仰各州縣掌印官各定申明旌善二
亭老人每亭止許二人俱選家長殷實行止老

成素無過犯者取具里隣保結收充前役仍行
國初彰善癉惡之令記書善惡毋得仍用無籍之徒
生事害人各將遵行過緣由開報

一看得洪雅名山等縣各條陳案查先該本院訪
得蜀中土豪大戶違禁取利准折人口刊示嚴
禁去後今據各該縣申稱榮昌茂州簡州仁壽
富順威遠等處富民越境貨賣違禁取利以致
小民傾蕩家貲盜賊由生相應申明已經行仰
各該縣禁革外今訪前項之徒不獨榮昌茂州
簡州仁壽等處之民為然槩省均亦有之今再

通行禁諭仰各掌印官即便嚴行禁示今後如
有前項越境放債結黨害衆之徒到彼營利者
不許地方容留其有原借錢貸如本利未還許
照律交還加息不得過三分若係利上加利許
將原立文約首正在官審明取供就將銀約塗
抹免還如有積年保債之人故縱容留及大戶
仍前越境違禁取利者就便擒拏從重究問招
詳將犯人遞回原籍當差如本處大戶違禁取
利者一體遵照先行案驗禁治施行各將遵行
過緣由回報

芝園別集

公移卷之二終

